

Regional News Unit AIR Aizawl
Tuesday, November 26, 2024
Time - 7:30 -7:40Hrs

REGIONAL NEWS BULLETIN

HEADLINES (MORNING)

- Ramsain ranvulh a tihhlum sak te zangnadawmna a pek thin a tihsan chu ranvultuten an tangkaipui a beisei thu AH & Vety Dept chuan a sawi.
- Manipur state chhung buaina avanga Churachandpur leh a chhehvela FCI Aizawl in buhfai a thawn thin chu tluang taka la kalpui zel a ni.
- Vawiinah ram danpui ni National Constitution Day vawi 75-na lawm a ni dawn.
- Union Cabinet chuan damdawi leh hlo tello thlai chin uar tura hmalakna National Mission on Natural Farming a pawm.

<><><>

AH & VETY

Animal Husbandry & Veterinary (AH&Vety) department Director Pi R. Zothanmawii chuan tunhnaia Mizoram sorkarin ramsain ranvulh a tihhlum sak te zangnadawmna a pek thin a tihsan chu ranvultuten an tangkaipui a beisei thu Akashvani a hrilh.

Akashvani Corr nen an inkawmnaah AH& Vety Director chuan hmun thenkhata ran vulhtu, a bik takin sial vulhtute, an sial vulh ramsa in a tihhlum sak avanga harsatna an tawh thin thu a sawi a. Hei hi ranvulhtute tan channa nasa tak a nih thu a sawi a. Zangnadawmna lo pek tawh thin chuan an harsatna eng emaw chen sukiang mahse an ran hlutna tehin a beitham thin a. Tunhnaia Chief Minister hoa State Board of Wildlife thutkhawm vawi 10-na in zangnadawmna a pek thin a tisang chu lawmawm a tih thu leh helama harsatna tawk te tan thil tangkai tak a nih a beisei thu a sawi a ni.

State Board of Wildlife in zangnadawmna rate thar a siamah chuan ramsa in a tihhlum Sial leh bawnga cheng 37,500 a pek thin chu kum khat hnuailamah cheng 40,000 leh kum 1 aia upaah cheng 80,000-ah tihpun a ni a. Tlangram bawng (hill cattle)-a cheng 37,500 pek thin chu kum 1 hnuailamah cheng 15,000-ah leh kum 1 aia upaah cheng 30,000 in a tidanglam bawk a. Ramsain vawk a tihhlumah kum 1 hnuailamah cheng 15,000 leh kum 1 aia upaah cheng 40,000 pek thin a ni ang a. Kel leh beram a tihhluma cheng 4000 pek thin chu kum 1 hnuailamah cheng 2000 leh kum 1 aia upaah cheng 5000 pek a ni tawh ang a, ar bikah cheng 100 pek thin chu kum 1 hnuailamah cheng 100 leh kum 1 aia upaah cheng 300 a ni tawh dawn a ni. Hei bakah hian ran vulna in tihchhiata cheng 3000 pek thin chu, a chhunga an vulh ran kum 1 hnuailam a nih chuan cheng 40,000 leh kum 1 aia upaah cheng 80,000 pek a ni tawh dawn a ni.

<><><>

MSPMC

Mizoram State Project Monitoring Committee (MSPMC) chuan an Vice Chairman Pu R. Lalrinawma hovin Durtlang Leitan atanga Sihphir kawng siam mek chu tlawhin hmalaknate an endik a.

He kawng hi Km 10.250 a thui tur niin, Sawrkar laipui Ministry of Road Transport & Highway (MoRTH) hnuai Central Road & Infrastructure Fund (CRIF) Scheme atangin cheng vaibelchhe 46.57 hmuh a ni a. EPC Mode a thawh a ni a, Contractor chu SLT Infracon Pvt. Ltd., Hailakandi, Assam a ni.

Sorkar thuchhuah tarlan danin, he kawngpui siamna atan hian Concrete Grade sang tak hman a ni a. A siamna hmanrua pawh a tha thawkhat viau a ni. Khawl hmangin hna hi thawh niin November 2024 thlenga hnathawh tawh chin hi zaa 3% vel a ni. He hna hi January 2025 a zofel hman tura ruahman ni mah se, hna hi a khaihlak thin avangin a zawh hun tur aia rei an hman a rinawm a ni.

MSPMC te chuan he hna thawk tura Contractor inbuatsaihate chu a tha thawkhatin an hria a. Tha taka zawhfel thuai a nih theih nan Sawrkar, Contractor leh khawtlang hruaitute thukhat vuaa tan ho a tul thu an tarlang bawk.

He hna endiknaah hian PWD Aizawl Road North Division-a Officer-te, Durtlang Local Council-te leh Sihphir Village Council te'n MSPMC te hi an tawiawm bawk.



FCI

Manipur state chung buaina avanga Churachandpur leh a chhehvela Food Corporation of India (FCI) Aizawl Divisional Office in buhfai a thawn thin chu tluang taka la kalpui zel a ni a,

FCI Aizawl Divisional Manager Pi Zodinpuui Ralte chuan Churachandpur-a buhfai an thawn tan nikum June thla atanga tun November thla thlengin buhfai quitai nuai 1 sing 7 sang 9, 565 chuang hret a nih thu a sawi a. Sorkar laipui atanga titawp tura an rawn tih lemloh chuan pek chhuzawm zel a ni dawn a ti.

Pi Zodinpuui Ralte chuan Churachandpur-a buhfai an pek thinah Mizoram sorkar pawhin theihtawp an chhuah pui tih a sawi a. Bairabi-a rel a lo thlen apiangin truck 20 atanga 30 vel bawrin an thiar chho ziah tih sawiin rel-a wagon an dawn zat milin ruahmanna mumal tak hnuaipek chhoh thin a ni a ti a. Fur laia kawng a chhiat nasat lai pawha tlawmngai taka buhfai phur thin tu truck khalhtute leh neitute chungah an lawm hle tih a sawi bawk a ni.

Churachandpur-ah hian an state chhunga buaina a chhuah avangin sorkar laipui chuan Food Corporation of India, Aizawl Divisional Office hnenah buhfai thawn thin turin a hriattir a. Nikum June thla khan buhfai quintal 8566 chuang hret thawnin bul an tan a, an thawn hnahnun ber, tun thla bikah quintal 10,541 chuang hret an thawn thung a ni.

FCI Aizawl Divisional Manager chuan Churachandpur hian Manipur state khawpui Imphal lam atangin buhfai an dawn theih loh thu a sawi a. Jiribam, Assam lamah rel thleng ve tho thin mahse Imphal paltlang a ngaih avangin helam kawng atang hian buhfai phurh luh theih a nih loh thu a sawi bawk a ni.



MZU SEMINAR

Ni 2 awh tur National Seminar chu Mizoram University ah neih mek a ni a, “India’s Foreign Policy: Coping with the changing World” tih thupui hman a ni.

Department of Political Science, Mizoram University leh ICWA, New Delhi te tangkawpin an buatsaih, he seminar hawna nimin khan Education Minister Dr Vanlalhlana a hmanpui a.

Dr Vanlalhlana chuan Policy pawimawh duang tur leh policy a hlawhtlin theihna atan zirchianna neih hmasak a pawimawh tih a sawi a. Ram pawn lam nena thawhona atana kan policy - Foreign policy kan tih mai hi Tualchhunga Policy kan neih dan nen nghet takin a inkungkaih avangin, Tualchhung lam hi Foreign Policy mumal nei tur chuan kan inchinfel hmasak a ngai thin a ti.

Research base zela kal hian policy duan pawh a tha duh a, hei hi research scholar leh academician ten kan hriat a pawimawh a. Sawrkarin eng policy pawh a siam dawna rawn tlak research work nei tura kan tan a a ti.

Minister chuan Seminar Session thumna India’s Eastern Orientation and Neighbours” chu “Act East Policy” nen thuhmun a nih avangin Mizoram leh India Hmarchhak lam tan chuan India ram in International Policy a kalpui zingah pawh a pawimawh fal nia a ngaih thu a sawi.



FIT INDIA WEEK

Aizawl West III Bialtu MLA Pu VL Zaithanzama hoin nimin khan Sports Authority of India (SAI) bultuma buatsaih Fit India Week, 2024 chu Govt. Mamawii Higher Secondary School, Aizawlah hawn a ni.

Fit India Week, 2024-ah hian Mizoramah chuan volleyball, quiz leh painting hman tein intihsiak a ni a. Yoga leh meditation pawh huaihawt niin wawiina pungkawm te hian Fit India thutiam an sawirual bawk a ni.

Fit India Week hi ram pumah Ministry of Youth Affairs & Sports leh Ministry of Education tangkawpin kum 2019 atang khan buatsaih a ni a. Kumin Fit India Week hi ram pumah tun thla ni 15 atanga thla thar December ni 31 inkara neih turin ruahman a ni.



AIR ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.



NATIONAL CONSTITUTION DAY

Vawiin hi ram danpui ni National Constitution Day vawi 75-na a ni a. Sawrkar laipui chuan vawiin atanga tanin kum khat chhung National Constitution Day hi hman turin a puang a. Kum 2025 November ni 26 thleng lawm a ni ang.

Kum 1949 vawiin angah khan Constituent Assembly chuan ram danpui hi a pawm a. Kum 1950, February ni 26 ah a taka hman tan a ni. Union Parliamentary Affairs Minister Kiren Rijiju chuan New Delhi-ah chanchinbumite kawmin Constitution Day pual hian Delhi-a Samvidhan Sadan-ah inkhawm buatsaih a ni dawn a ti. He hunah hian President Draupadi Murmu-i chuan Parliament Member te hmaah thu a sawi dawn a ti.

He ni hriatreng nan hian pawisa thir leh stamp a bika siam tlangzarh a ni dawn bawh a ni.



NATIONAL MISSION ON FARMING

Union Cabinet chuan damdawi leh hlo tello thlai chin uar tura hmalakna National Mission on Natural Farming a pawm. Union Information & Broadcasting Minister Ashwini Vaishnaw chuan hemi chungchang hi chanchinbumite hrihlin he mission atan hian cheng vaibelchhe 2481 ruahman a ni a ti a. Damdawi leh hlo tel miahlova thlai chin chu tuaithar leh tumin sawrkar chuan he mission hi a kalpui dawn a ti a. Gram Panchayats sing 1 leh sang 5 ah he mission hi tihhlawhtlin tum a ni ang a ti bawh.



ICA

Prime Minister Narendra Modia chuan eibar zawnaa sum lengvelah leh khawvel ramte hemi kawnga thawhhonaah Cooperative chu a pawimawh thu a sawi. Nimina ICA Global Cooperative Conference chu Bharat Mandapam, New Delhi-a a hawnaah he thu hi sawiin Pu Modia chuan khawvel chhiam lam ram Global South te hmasawn nan a pawimawh zual a ti bawh. Pu Modia hian sawrkarin Cooperative lama sawrkar hmalakna te a tarlang bawh a ni.

Puan tawh angina ICA Global Conference hi kum 130 hnua a vawi khat nan India ah nghah a ni a. He ni pual hian Pu Modia chuan ICA 2025 hriatrengna stamp a tlangzarh bawh a ni. Conference ah hian Bhutan Prime Minister, Dasho Tshering Tobgay, Fiji Deputy Prime Minister, Manoa Kamikamica te pawh an tel a ni.

ICS Global Conference hi Indian Farmers Fertiliser Cooperative Limited, ICA, sawrkar laipui leh Indian Cooperatives AMUL, leh KRIBHCO tanghoten an buatsaih a ni.

